

Reben kuning untuk wartawan dikasari polis
MalaysiaKini.com
May 02, 2012
By Leven Woon

Kerajaan Selangor menyertai beberapa pertubuhan media bagi mengutuk kekasaran polis terhadap wartawan yang membuat liputan ketika perhimpunan BERSIH 3.0 Sabtu lalu melalui ikatan pita kuning.

Dalam sidang media hari ini, Menteri Besar Tan Sri Khalid Ibrahim, exco Teresa Kok, Ean Yong Hian Wah dan Yaakob Sapari mengenakan ikatan pita kuning atas permintaan wartawan yang hadir.

Kumpulan pemberita memotong dan mengedarkan pita itu kepada rakan-rakan mereka sebelum sidang media itu.

"Esok Hari Kebebasan Media Sedunia. Kami akan pakai pakaian hitam dan pita kuning bagi menunjukkan solidariti terhadap wartawan yang diserang," kata seorang pemberita Selangor Times yang mengambil inisiatif itu.

Pita atau reben kuning antara simbol kebebasan media yang digunakan di seluruh dunia.

Sementara itu, Khalid berkata beliau bersimpati dengan nasib wartawan berkenaan dan tidak bersetuju dengan serangan itu dan sudah masanya untuk masyarakat membuat perubahan.

"Kamu menambahkan nilai kepada pengetahuan masyarakat supaya mereka dapat membuat keputusan lebih baik. Tanpa media yang bebas, kita tidak akan menjadi masyarakat berpengetahuan," katanya.

Copyright © 1999-2012 Mkini Dotcom Sdn. Bhd
Source: <http://www.malaysiakini.com/news/196717>

